

四庫全書

集部

欽定四庫全書

集部
文恭集卷十九

詳校官侍講_臣王燕緒

檢討_臣何思鈞覆勘

總校官原任中允_臣王燕緒

校對官編修_臣于鼎

謄錄監生_臣章玉植

欽定四庫全書

文恭集卷十九

宋 胡宿 撰

外制

皇姪宗懿可端州刺史皇姪宗述可右屯衛大將

軍制

敕國家承軒祖之詒謀法陶唐之敦族封爵同姓體貌
大宗道在維寧恩宜加腆具官某孝恭履德信厚成風

具官某性茂溫文體資英嶷竝稟玉林之粹悉含銀派之和胥被寵章參居環衛奉朝惟恪居邸有聞朕濬百世之遙源謹九宗之屬籍惟時賢亮司我本支宜酬營職之勞遞遷冢子之秩特升藩刺對總巖除豈惟旌是似之美才蓋以褒乃親之有德惟欽擢敘勿替踐修

皇姪宗樸可貴州刺史皇姪宗藝可左領衛大將軍制

敕分建宗屏參睦本支環設衛官拱扈宸極號為要職

舉屬茂親以爾宗樸迴稟靈華居然信厚以爾宗藝夙
成體哲樂善為猷竝茲絲庭之昌咸睦大宗之訓師言
是率禮範攸循屬敦敘以崇風宜褒嘉而進秩列城遙
刺大將超遷且光閭寄之雄兼衛巖除之重宜懋遵于
法度用對越于寵休

皇姪右千牛衛將軍士穎可莊宅副使制

敕某宗子之良見推才實輟于環衛寘我周行往究汝
能毋忝予寵

皇親男授官可竝副率制

敕某等國家神明之後本枝茂焉爾等蔚為文孫適在
穉齒已勝衣而能拜且就傳之有期會嚴祀之涓成覽
大宗之條請宜優初秩仍錫嘉名數從率府之除滋厚
宗藩之睦

皇親賜名與官海詞可竝右內率府副率制

敕國家祚出神明之後慶席祖宗之靈蕃育文孫參映
皇室朕乘感誕之節孚敷敘之仁澤厚近支體先異姓

閱大宗之言上用諸郎之通規昭揚嘉名甫班初命勉
勤幼志虔服茂恩

樞密使王

某

親姪孫延年給事中參知政事劉

某

親孫男子雅工部侍郎參知政事劉

某

親孫男燾

竝可守祕校制

敕國家誕辰故事推恩邇列法得任于門子禮特優于
政弼以爾等年妙志美體安節和本諸惠訓之深稔于
宵雅之肄宜有官簿用寘京司祇我恩章勉于學力

少傅致仕李若谷遺表奏泉州進士薛穎士可試
國子四門助教制

敕某韋布諸生甌閩遠客久託名臣之館近罹東道之
喪素行無虧遺章有請用試員于學省且略選于銓臺
俾有官稱勿忘士矩

太子少傅致仕任布孫拱之可試祕校太子少師
致仕任中師姪孫元之可試監簿制

敕具官某孫某朕因感流樞誕節之慶優安車就第之

老賞其世嗣延以朝恩爾等挺生名門滋承忠教服士
矩而允若亦地勢之使然宜有官聯以漸時使分從試
秩咸用起家尚服初榮益思自勵

兵部尚書陳執中四從姪孫太初可試四門助教
制

敕具官某四從姪孫某惟爾從祖任吾大臣曾高以來
丘墓在遠若為疏屬尚夷平人守護有年掃除甚力俞
其章請試以學員且奉舊塋匪敘常選

故龍圖閣學士禮部侍郎劉筠從孫景純可守將
作監主簿制

敕具官某孫景純夫修廢功援絕世聖王之高政春秋
之美意也以爾從祖筠懿德大雅殊行偉才逮事章聖
之朝經為禁林之老朕初紹宅稔聞納忠朝匠亡身支
庶尋隕烝嘗罔寄門戶可哀因命有司推求近屬爾少
承緒業親則諸孫禮存出繼之文世載為後之義俾員
大匠用續前人往慎爾修當虔吾詔

故翰林學士彭乘男敏行可太祝景行可奉禮制
敕具官某男某爾父號為時德服在禁林遽嗟至哲之
萎且表諸孤之藐緒言未泯遺音可傷用推延世之恩
式寄通臣之悼爾等稔聞鄉學滋被教忠竝因聞禮之
餘差進奉常之屬尚圖樹立自致顯揚

故翰林學士彭乘姪壻王寧可試將作監主簿制
敕具官某姪壻某早服縫衣屢干貢部未有仕版尚栖
衡門屬予侍臣今者捐館閱其遺札爾則外嫻來祈恩

典之延用補匠員之試惟當以藝無用選為

侍讀學士戶部侍郎王拱辰親兄拱安可試將作

監主簿制

敕具官某早列廷臣屢馳使傳屬誕辰之敷澤因仲氏
之貢章求寘京師願謝班籍方倚股肱之郡用嘉手足
之情寵以匠員宜茲門緒往踐官箴之厚益循士矩之
良

故翰林侍讀學士葉清臣遺表妻兄進士趙淳可

試將作監主簿制

敕具官某妻兄進士某爾紱冕之餘伏膺門業已踰強
仕之齒未及進官之門近者失吾名臣弗克柄用時則
遺奏爾乃外嫻來求餘渥之延特越常均之比試諸匠
屬姑有仕階尚當勉之無忝逝者

禮部侍郎致仕蔣堂姪之器可試祕書省校書郎
制

敕具官某姪某惟乃仲父實予名臣鑒知止于道家還

時事于宰旅寢延酬賞參澤近支以爾業承清門義均
愛子被風訓而逾劭聞學尚之足佳往試祕丘初有官
簿懋勉時術奮取世科以為慶閥之光寵不亦美歟

故工部侍郎致仕楊偕親孫景道可守將作監主
簿制

敕某孫某惟爾大父若時名臣方授禮經謝去官政如
何不淑奄至云亡爾惟裔孫朝有恤典宜從匠屬之補
用推世賞之延往服官箴勿忘風訓

司門郎中致仕樂安國男溫可試祕校郎制

敕具官某男某爾父年老為郎章言還政願回遷授之
澤以延嗣續之榮爰試秩于祕丘用承顏于子舍勿忘
樹立益務勗修

職方員外郎致仕王述男孝叔可試將作監主簿
制

敕具官某男某爾父剛于為吏老滯諸郎以疾乞年有
章謝事法得任子意在養親祿可奉于旨甘誼足感于

幼艾匠員往試門緒勿忘

駕部員外郎致仕陳淨男枚可試將作監主簿制
敕具官某男某爾父老在郎潛表還官政且厚引年之
寵用推任子之恩試以匠員續其門緒即宜祇命勿替
承顏

都官員外郎致仕盧器男洪可試將作監主簿制
敕具官某男某爾父著中臺之籍預外朝之聯來上奏
封求還時事願回挂冕之澤用為膏構之榮爾滋服義

方祇勤孝養往參匠屬庸示朝恩且慰家嚴之情勿忘
子舍之恪

都官員外郎致仕王璠男駸可試將作監主簿制
敕某男某惟乃之父有著在廷嘗授經于藩房旋倅政
于州服以疾謝事援比乞恩用試秩于匠員俾承顏于
子舍慰茲挂冕勿替為箕

虞部員外郎致仕王周男某可試將作監主簿制
敕具官某男某爾父少從官政晚寘郎曹年及杖朝表

求解紆願以歸休之渥移為似續之榮稽用朝彝俾參匠屬往佩起家之寵勿忘肯構之言

虞部員外郎周德延男慶之可試祕書省校書郎制

敕某男某臺郎員外于法未當任子朕愍告老之士著推恩之令使夫養者有祿退者無戚恩用延于似續義足感于耆艾爾父年合禮經秩在虞衡章言公車謝去官政舉用茲典往試秘局當思進宦之難勿忘奉養之

恪

故王德基男咸有可閤門通事舍人許持服制

敕具官某男某朕悼師帥之臣殞邊隅之任思究哀榮之典併推似續之恩以爾出自勲門本諸忠教著籍廷臣之次典謁天墀之華邁于閔凶越在哀疚覽遺章之所請懷前人之弗忘特升宣納之名俾進近嚴之列聽從終制勿替移忠

河北都轉運使吳鼎臣遺表奏親孫男承規傳規

竝可試將作監主簿制

敕具官某孫某等鄉選爾祖使漕朔方甫寄劇煩遽嗟
奄忽覽觀遺札采錄諸孫用開允于緒言俾鈞稽于匠
屬咸思祖服之重往承朝渥之優

夔州路轉運使楊文舉男彥誠可試祕校制

敕具官某男某爾父委之使傳往恤吾民章言公車祈
任及子且勤已徼之遠用延世賞之榮優以校文試于
秘省茲為漸陸勿忘起家

淮南轉運使李仲偃次男孝直可試祕書省校書

郎制

敕具官某男某爾父久以清德厚行名稱朝廷方委將
漕之煩來援任子之法爾滋承風訓瑩有神華宜試秩
于祕丘用起家于名閥勉修遠業祇服茂恩

故寧遠將軍知棣州田彥晏長孫忠俊可溪洞都
巡檢故知富州田承亮弟承喜可銀酒監武知富
州制

敕某等族依邊徼世奉闕庭能撫種人善靜吾鄙屬大

門之殞

案此句有脫誤

得使部之奏陳寵以憲聯授之勲級當

傾輸于忠力以承嗣于前人

故麟州烏嚕族下班殿侍三班差使羅佑親男崖

可本族副都軍主制

敕具官某男某以爾族居戎落代服忠圖內正聲明遠
為保障閱守臣之通奏言爾考之淪亡用稽世襲之科
俾錫軍幢之號益思固圉以美克家

滿濟置勒噶卜楚男置木磋沙克置伊實男吹置

勒沙克置庸蘇男斯結斯清矩嘉奇正男戩巴勒

沙克置揚摩男細斯承續制

案滿濟置勒噶卜楚原文作蒙家叱噶靛

置木磋原文作兼卒沙克置伊實原文作捨家也
結吹置勒原文作穹靛落沙克置庸蘇原文作施
家藥四卒斯結斯清原文作廝結四青矩嘉奇正
原文作俱家欺征戩巴勒原文作膽彪沙克置揚
摩原文作捨家養抹細斯原文
作惜四今並依唐古特語改正

敕具官某惟爾之考弈世居邊內拱朝風外扞吾圉奄
從喪逝良用哀矜閱本帥之奏陳求遺孤之承續即其

戎落授以軍首咸率忠誠勿隳先志

集賢相宋庠妻淮陽郡夫人胡氏可成國夫人制

敕朕慎調元之任尊置相之儀選諸具瞻用正名于茂
宰迹其內助復加惠于小君且明朝禮之優實旌壺則
之茂某官某妻某氏矩儀淑慎族望華腴四德之教婉
從二物之經參濟嬪風以穆家事用修惟乃夫子之賢
膺我弼臣之舉義由協濟恩用褒嘉昨而成國之封光
乃慶門之合采車進飾象服益宜往欽名數之華逾奉

箴圖之訓

平章事龐籍妻彭城郡夫人劉氏可進封彭國夫人制

敕朕以樞衡大柄屬于耆俊之臣乃用車服殊章旌其
賢善之室蓋進弼之任重則加惠之典優詳按朝文敷
施邦采迹通規而惟舊昭惠問而則新具官某妻某氏
柔正含風閒華表性挺生勲閥蹈四德而無違來歸德
門經二物而有助鄉用哲夫而圖政已自小君而進名

昨之大彭宜是象服適中階之命相惟內壺之配台有
升庸進秩之褒昭積行累功之致滋峻起家之美進開
成國之封恩數益華儀品參稱當思名器之旌禮尚勤
圖史之詔言往服寵靈永孚嘉告

故引進使果州團練使王克忠妻上黨縣君石氏
可進封武威郡君制

敕具官某妻某氏爾之所天嘗經事朕忽成淪逝良用
盡傷愍飾之恩既加于密印疏封之渥更及于帷堂以

爾族茂華腴德彰韶令服攸箴于圖史躬乃職于組紉
攸遂靡譏殲良遽及特升榮于郡甸慰銜恤于家閤宜
誓柏舟用虔綍命

故引進使陵州團練使王克基妻張氏可封清河
郡君制

敕朕愍親信之逝有懷若人推封昨之恩用慰其室具
官某妻某氏挺于冠族躬乃柔儀作合公侯之門昭宣
圖史之訓行無攸遂痛在未亡追用所天之勞申加益

地之典進疏郡甸昭示朝榮彌敦正淑之規以對褒嘉之命

濟州防禦使張茂實妻劉氏可封彭城郡君制

敕具官某妻某氏出高華之族稟柔婉之風懿範交修
憲言祇率屬巖下之衛方用乃良而闡內之封宜優異
等特疏榮于望郡用申寵于名城往祇茂恩益敦淑履
參知政事高若訥姊陳宗古妻可封文安縣君制
敕親有立愛之言澤存及族之義況近司之預政為同

產以祈恩義有可嘉朕亦何愛具官某姊某官妻婉靜
有儀賢和自飭從所天而不違誓已志而未忘覽仲氏
之善言敘共姜之守節兼回必祀之渥冀得寵章之封
析以縣田胙之湯賦往祇茂澤彌勉柔風

禮部尚書同中書門下平章事文彥博妹信安軍
判官成偉妻可封永康縣君制

敕本根盛者枝葉茂焉慶既發于名門澤宜覃于勝族
以爾具官某妹文氏矩儀閒遠思理詳和歸于令人綽

有賢範雖榮珠履之伉未徹粉田之封惟時哲兄任我
元宰沿親聞喜愛之志移合宮進胙之恩因求綍章願
啓湯賦有美謙恭之尚兼圖孝愛之嘉特疏縣壤之腴
俾獻慈堂之壽併伸前寵式表重榮

張方平女故殿中丞蔡天申妻張氏可封壽昌縣
君制

敕某氏爾父德善在躬參貳機柄均勞于外得謝朝廷
延賞致恩國有舊典爾徽柔莊靜嬪于慶門錫以邑封

庸示褒寵思永燕譽宜其家人

長安縣君可封仁壽郡君制

案長安縣君上脫某官某女等字

敕具官某女某氏昔師臣張禹病漢文帝車駕臨問之禹以愛女為言乃知常情之所不免也今吾肱臣所虧墨奏猶濕且有安昌之請求益石窀之封矧婉範夙成惠問有淑宜裂多城之壤用增湯賦之田欽對茂恩勉循懿矩

定武軍節度使承裕第六女遂寧縣君趙氏可進

封長樂郡君制

敕某氏淑婉有儀嬪于良士同天之慶均逮宗親錫封名城用為華寵

磁州防禦使承亮等女可竝封縣君制

敕某等穆有性範秀發天文已茂穠華之風猶疏湯沐之賦經祝延之紀節廣惇敘以推仁特啓縣田用招邦族往祗寵數尚勉柔儀

防禦使宗旦等新婦可竝封郡縣君制

敕具官某妻某氏朕以震誕之辰因祝延之慶旁均恩
施近澤本支以爾族茂蔭華體閒性正少服公宮之教
居佩女師之篇作合宗藩協恭巽饋邁樞纏之紀節睦
邇族以敦仁用疏郡君列郡縣君佳邑之封式允大宗之請析而
湯賦虔我綽恩

右領軍衛將軍克修所生母李氏可封南陽縣太
君制

敕惇敘之愛所以睦宗藩封胙之恩所以厚邦典以爾

具官某母某氏性為淑哲族本華腴因乃子之祈恩屬
大宗之獻狀特疏望縣用錫美名宜虔渥茂之思益蹈
謹良之戒

左龍衛軍大將軍饒州刺史承翊親育母霍氏左
金吾衛大將軍舒州團練使潁國公從謁所生母
鄭氏右千牛衛大將軍文州刺史宗敏所生母范
氏可竝封縣太君制

敕朕以扶厚人倫糾綏邦族爰及祝延之慶宜推天敘

之恩以爾具官某等所生母法度自將矩儀兼劭挺生
宗哲參茂本支適因震誕之辰來控疏封之請且將崇
孝亦用廣恩特優縣甸之名姑徇藩房之美滋敦柔範
益服寵章

左監門衛將軍宗翰所生母劉氏可進封縣太君
制

敕天下之風莫先于孝門內之治必本于恩某母某氏
性婉而和德柔且正實生宗子乃領衛屯來祈湯沐之

封用順劬勞之報昨之名邑錫以命書往欽茂恩益修
懿矩

右江溪洞田州知州黃光倩母阿儂可封宣化郡
君制

敕某氏爾服于遐荒克有材智料籍丁壯勞勤顯聞錫
以命書用為寵勸

皇弟安德軍節度使華原郡王允良乳母王氏可
封永壽縣君制

敕具官某乳母某氏少率姆訓善治禮防于藩邸有保
阿之功惟朝家敦崇睦之典需章有請舊恩弗忘宜疏
湯邑之封姑徇藩王之願益圖淑慎進服寵榮

贈鎮江軍節度追封丹陽郡王守節乳母徐氏可

封高平縣君制

敕某乳母某氏朕睦邦族之良愍宗藩之逝延錄保阿
之舊申加封胙之恩析用縣田進為湯賦尚慎柔嘉之
履往欽褒敘之榮

貴妃大姑張氏可特授典正制

敕掖廷建職參綰內司宮正有僚分條近職竝圖才淑
選侍宸嚴貴妃大姑某氏族茂高華德昭婉穆少服大
家之訓早聞良袂之風入踐祕塗益彰柔範宜升司正
之掌滋示寵名之華往服茂恩恪思慎履

貴妃第八妹張氏可封清河郡君制

敕具官某第八妹張氏挺生慶門參懿柔矩服憲言而
有自謹姆教以無違通籍掖庭預長安之外戚選名與

地昨列郡之封君往欽湯沐之榮益懋柔嘉之德

貴妃乳母周氏可特封長安縣君制

敕某乳母周氏柔謹資性保阿有勤閱椒掖之上言求
粉田之錫號移別恩而用授明前惠之聿圖昨以縣田
為之湯賦尚勉循于懿矩往祗服于茂章

德妃位聽宣夫人張氏韓國夫人位聽宣夫人張
氏竝可封掌膳制

敕某等資承淑茂選侍禁嚴欽柔範以無違躡祕殿而

有裕親承音旨益慎矩儀用醕年序之勞稍進膳羞之
掌茲惟褻渥勿替恪恭

魏國大長公主親外孫女錢氏可封壽安縣君制
敕朕惇敘之恩尤尊于外館彙征之吉宜擇于近支以
爾某族本華腴性資韶令世素傳于帶礪言早服于箴
圖屬貴主之為言乃賢女之攸出宜疏湯賦用錫縣田
往承渥茂之封彌服柔嘉之尚

文恭集卷十九

欽定四庫全書

文恭集卷二十

宋 胡宿 撰

外制

蔣堂可禮部侍郎致仕制

敕非達人無以蹈止足之美惟賢者乃能潔去就之分
睠言舊德適殿中兵援經禮以露誠抗封章而還政且
優哲艾用遂晏安具官某才粹而文道沖且正體風識

而盡遠懷資術而本強進直計樞之嚴比歷藩房之重
老于政事故吏道之可師式是風華惟名教之為樂績
宣中外治盛東南引周任之有言遵祁奚之請老朕方
希古忠厚惜時者明稔聞歸志之堅姑從繕性之適閔
勞煩事成美名周官亞旅之聯春卿宗伯之貳峻是
儀等昭我恩章勉爾嗇和以永遐福

王渙可太子賓客致仕制

敕禮耆齒尊舊德所以尚賢存道體厚仁俗所以弼化

矧吾謝事之老風懷經哲之風前識表微高蹈知止屬
茲成饗之慶命以增秩之甄用獎耆明且嘉澹退具官
某懿德攸好雅行是躬起王國之烝髦資名門之濟美
被服儒術緣飾吏文申翊宗藩曾惠訓之不倦艾服官
政固強力之未衰時用欽于老成世方期于策進而能
獨拔昏俗褫去華軒率經禮之攸行務名教之為樂固
以昭正素之履聳貪偷之風惟朝廷嘉尚之恩下歲時
存問之詔而神明克壯志慮彌沖會熙典之涓成貺茂

恩而進序升宮朝之調護適林岫之晏安姑遂松喬之游亦惟綺季之舊往服休命益御太和

蔡黃裳可右贊善王稹可太子中舍人苗存可大理寺丞劉制可大理評事竝致仕制

敕某等壯年遊宦皓首棲遲豈不爾勞尚困于選以年力之疲曳厭王事之驅馳自陳日侵願謝時使京師進秩朝序升聯竝增軒冕之華且慰丘樊之逸

許上達可太子洗馬謝元振可守國子監丞竝致

仕制

敕某等獲落暮年間關常選及此疲繭願從歸休意有嘉其自陳禮難強其不及聽還所任之政兼圖既往之勞洗馬進聯上庠丞秩且旌沿牒之久足慰挂冠之歸高牧可太子洗馬徐渥可守祕校竝致仕制

敕某等調集中銓叅承列掾或已及皓首或稍厭折腰竝附郡郵願謝曹事有嘉知止用示寵甄儲禁洗馬之榮祕丘抱槩之美式光歸志宜體優恩

劉忠信可太子中舍人致仕制

敕某本治曲臺之經屢更大選之集衰遲已至疲繭自言願解一同之章允從三徑之適嘉其審分寵乃謝歸進朝秩于奉儲致官勞于娛老

李備可太子中舍人致仕制

敕某久從銓唱參預賓籌稍疲管庫之勞且有挂車之請少盡風力老歸丘樊宜錫寵恩以娛晚志擢參儲案進服朝闡足為里閭之華尚從康稍之急

艾介石可太子中舍人致仕制

敕某早集選部晚至綱曹自陳年疾之餘不堪官使之
劇願從謝事當有推恩特升儲案之華用為家閑之寵
姑從所欲勉務自將

楊令望可太子中舍人致仕制

敕某少壯服官衰遲作掾能知經禮之訓願謝紀綱之
勞止足可嘉歸休宜寵用寘宮坊之秩往為里閭之榮
佚老在茲祇命無忽

張隨可太子中舍人致仕制

敕某本階經術之進歷趨選集之勞比至都綱則已皓
首乞身有請謝事為高用遷儲案之華以慰里門之式
尚思佚老當體推恩

孫可度可太子中舍人致仕制

敕某爾少壯服官久間闕于銓集衰遲仕郡尚黽勉于
綱曹居多几案之煩自陳齒髮之邁願還初服且寬至
誠

姜湛可太子中舍人致仕制

敕某本由治經早預從政甫備列卿之屬且釐外局之煩引疾自陳謝事為請宜從藥石之便難勉筋力之為寵以儲僚慰其暮齒尚勤輔助當體寬優

韓松可太子中舍人致仕制

敕某爾身為絳簿籍在銓流已過亥人之年頗嗟離羣之日能自言于州郡求歸老于田園宜進奉儲之華以為挂冕之寵足榮故閑且慰頽齡

趙維可太子中舍人致仕制

敕某奮由一經困于久宦遠任州綱之劇自陳年老之
衰求解所官且還初服能遵經禮宜有朝恩升儲禁之
為僚寵家園之佚老尚勤輔助往體寬優

孟朝宗可太子中舍人致仕制

敕某少超選格晚至州綱展公力而弗遺佩官箴而無
缺自陳衰齒求謝劇曹審分可嘉歸休足樂宜進承華
之秩用為故閑之榮往服寬優自從頤養

張正可太子中舍人致仕制

敕某治經中科沿牒署令久預銓流之集自陳年力之
侵願解縣章求返初服愍輸勞之且久在知止之可嘉
宜升窠于宮坊俾增榮于家墅

鄭崇德范振竝可太子中舍人致仕制

敕某等進升仕塗淹移銓序或為列郡之綱紀或寄大
邑之弦歌竝迫暮年自陳老病愍驅馳于職事聽頤養
于精神寵僚選于承華服朝榮于故閑用光晚節當體

優恩

李逢可太子中舍人侯允恭可祕校竝致仕制

敕某等或治經服官或入資署吏亶無遺力咸有積勤
至列郡之紀綱任詞曹之參佐自陳暮齒且白縣病難
強沒階之趨願從挂冕之逸特升僚于東禁用試秩于
祕丘以慰歸與且嘉勞止

趙穆可太子中舍人馬宗諒可監丞竝致仕制

敕某等除吏且久秉事亦勞尚滯中銓俱以皓首能量

已分自白齒衰願辭印綬之勞得從井臼之逸聽謝官
守仍寵朝榮秩以儲僚丞之學省俾茲燕適往服寬優
蘇維岳王敏竝可太子中舍人李克明可國子監
丞竝致仕制

敕某等早集大選參服外勤仕至右曹長于劇邑或引
年知止或援疾自陳願歸休于田廬求謝去于州縣咸
從今欲併敘往勞秩以奉儲丞于太學慰茲遲暮便乃
養頤

韋陟可祕書丞致仕加上輕車都尉制

敕某朕曩者拜貺于郊覃渥在位爾時謝事法當推恩
渙號早行餘澤未究宜遷勲級用信教條就虔吾恩且
慰而志

呂佐可衛尉寺丞致仕制

敕某粵從版授真勾簿稽以侵西夕之年頗歎東隅之
失願還官事歸老家園特優列寺之丞且慰挂車之意

楊贇可衛尉寺丞致仕制

敕某補吏以訾上言稱疾求謝遠方之牒願挂下澤之
車用遷衛府之丞俾就家庭之佚聽而輔養體我寬優

孟元亨可大理寺丞致仕制

敕某早趨選集晚滯勾稽自陳衰老之侵且有乞身之
請嘉其知止寵乃歸休用升廷尉之平以慰南岡之步
皇甫采可大理寺丞致仕制

敕某早集銓流晚為郡掾不憚斗筭之役頗用簞簋之
修自白暮年願返初服宜承棘路之授且寵華門之歸

當服寬優往從怡適

吳旦可國子監丞致仕制

敕某爾早集都銓纔至諸掾揣蕭然之衰幹識知止之
大方乞骸以歸稅駕良善宜寵上庠之秩以為舊社之
榮

鄭有斐可國子監丞致仕制

敕某早從調集晚滯勾稽自陳齒髮之衰願謝簿書之
役服勞有自知止足嘉用丞庠學之榮俾遂丘樊之適

尚續以廩勉修于家

張太一可國子監丞致仕制

敕某少壯從宦遲暮倦游來辭下澤之勞願從初服之
逸進丞學省參列京司俾藥石之善持聽丘樊之自便
往究餘齒當體至恩

石待問可太常博士致仕制

敕某早以敏文階于俊選中嬰廢免再用敘收遂班文
石之朝已迫虞淵之景進趨良苦疲繭可矜以其早會

先朝嘗承大對特升司筮之局用光挂冕之歸往服優恩以究餘齒

趙真卿可大理評事致仕制

敕某嘗任勾稽之員坐受雇更之入自罹廢免尋命敘收掾于嶠南辭以親老來謝官使願從家居尚矜造士之餘特寵法卿之屬勿忘奉養當體寬優

翁爽可和州司馬致仕制

敕某早入銓流適隨掾牒附郵引疾謝事乞身聽解網

曹即授上佐仍優廩給當識臺恩

吳高可撫州長史致仕制

敕某少隸牙門晚有班籍以年力之疲曳愍王事之驅
馳即其本邦授以上介俾從安逸當體寬優

穆介可華州長史致仕制

敕某早直秘寢之聯嘗贊禁闈之謁中因罷黜尋復甄
收自陳年力之衰願謝斗筭之役特優上介當體寬恩

李仲連可左清道副率致仕制

敕某前朝近支南國餘胄早有庭臣之籍比乘使者之
軺煩局所更敏用無滯自陳年疾之暫願辭時使之勞
副東京二率之聯參屬官四品之列嘉其知止慰乃養
病尚體寬優忽忘輔助

張保和可右清道率府副率致仕制

敕某名存班籍年合禮經能省己以自陳願乞身而待
盡嘉其知止率以副員尚為逸老之榮往欽從欲之惠
姚可久可左監門衛大將軍致仕制

敕某執技以進歷稔且長嘗首太醫造正諸使比閱奏封之上自陳年力之侵願謝見官良合古誼俾升環衛之列仍假折衝之名當體寬恩以從佚老

宋榮可左屯衛大將軍致仕制

敕某早縻勇爵當當軍鋒奮士戶之積勞用邊關之勤略實諸環衛秩以折衝自陳年力之衰不任軍旅之役願謝時使得從家居閔煩宿衛之勞聽遂燕申之適益升屯衛當體寬優

錢子穆可左監衛將軍致仕制

敕某服在內聯綰于外務繭然疲役迫是暮年因郡邸
以為言求家園之佚老聽還時事尚寵衛屯往服寬優
自勤納養

耿從政可左領軍衛將軍分司南京致仕制

敕某領使親宅典戎近藩早稱幹能比更委使閱奏封
之來上陳老疾之侵衰願解兵防乞分留務愍年力之
少盡勉醫藥以自持進升環尹之名關領別京之衛仍

俞子舍之請就即縣齋之安當體至恩以究遐福

陳允恭可左監門衛將軍致仕制

敕某中預禁聯外監屯旅當番禺之卑濕苦毒霧之薰蒸重腿成痾步趨難力表解近墀之職言求環衛之名願尋疾醫且謝時事竝俞所請勉務自持

柴貽憲可左驍衛將軍致仕制

敕某世承累組之華朝賴敏材之用籍使聯之舊早服禁嚴司邦憲之平屢當審克頗著平反之效稔聞幹裕

之聲衰疾自陳歸休為請特優環衛之秩用適燕居之
宜尚體曲恩往怡晚節

劉吉可右領軍衛將軍致仕制

敕某少壯驅馳晚暮疲曳尚有最凡之目未經甄陟之
科自陳齒衰求謝官使有嘉知止為敘前勤優升拱衛
之名寬賜燕申之適悉從爾欲尚服茲榮往遂嘉貞益
頤眉嘏

文恭集卷二十

欽定四庫全書

集部

文恭集卷二十一

詳校官侍講臣王燕緒

檢討臣何思鈞覆勘

總校官原任中允臣王燕緒

校對官編修臣于鼎

謄錄監生臣章玉植

欽定四庫全書

文恭集卷二十一

外制

宋 胡宿 撰

皇姪宗鼎可贈邠州觀察使追封新平王制

敕凋落近支感深于邦族追加愍策恩究于國章某信
厚存誠溫恭表質克稟燕詒之慶有光敦敘之風鳴玉
奉朝剖符領郡顧年塗之未艾在志力之允嘉遽感疾

以歸全為廢朝而興歎特襚觀風之印仍班析壤之主
用昭追遠之懷茲示飾終之典庶幾營魄尚識寵靈

故太子太師致仕任中師可贈太子太傅制

敕義重股肱之虧禮尊冕服之襚務崇恩厚取究哀榮
矧聞政之舊臣早秉鈞以陪朕乞身未幾復魄可嗟追
懷鵠髮之良宜厚密章之飭具官某體行明潔志慮忠
純有秉彝經哲之風兼砥節首公之操圖其宿望屢煩
方面之行資厥老謀嘗預幾庭之訪比均勞典還守本

邦曾是壯猷，亶無遺力來謝時。事閑煩老成，俾參綺季之游。姑遂松喬之適，遽聞薨落。良用盡嗟，瞻舊人之弗忘。挹餘芬之未泯，追加宮傳之秩，增慰壙宵之靈。恩禮若茲，營魂尚識。

故四方館使新州刺史王克忠可贈引進使遙郡團練使制

敕禁近之臣嘗經于委使，哀終之典當厚于追褒。以爾具官某，階胄緒之華兼，器幹之敏歷，更煩局游聘殊疆。

虔使指以無違奉官箴而有恪晦明生疾奄忽收神短
歷可嗟愍章宜及進升使範參領軍團庶榮厚宥之遊
尚識治朝之渥

故洛苑使任承亮可贈正任團練使制

敕具官某襄恤信臣匪常于邦典追旌死孝用篤于人
倫以爾行義修明材謀敏劭入祇禁與履謹畏而寡尤
外治劇煩資恪勤而能力侍承親疾踰歷旬時藥必務
于先嘗目曾無于交睫因剖其腹遂隕厥躬可謂殺身

成仁舍生取義在竭誠之足感何與善之可疑特厚卹
章用嘉純孝襲進戎團之秩申寵壙宵之遊庶幾營魂
尚識恩禮

故文思使遂州觀察使史崇信可贈振武軍節度
制

敕親倚之臣忽嗟于殲落追襲之典用究于哀榮具官
某材則敏通性惟謹質給左右之事能寡于悔尤服內
外之勞克宣于忠力方任能于宿衛俄遘疾于晦明奄

至淪亡良深悲慨追用節旄之寵申加印綬之榮在恩禮而有殊尚營魂之無忽

故莊宅使李希及可贈眉州防禦使制

敕崇讓之風以損已為美愍飾之法用褒先曰榮具官某性蹈謹乎行稱篤實嘗歷近嚴之侍屢更煩使之勞享數弗融殲良已久生有慶靈之積蔚鍾似續之良續考以忠在朕之右請回遷秩之典求贈乃親之官美志可嘉恤章奚愛追升軍禦之重集增使範之榮尚歆予

恩往告而第

李懷贊可贈防禦使制

敕奉使宣勤既凝于前績念勞甄往宜賁于厚恩具官某性本謹良材惟幹裕任乃居于親信行則寡于過尤遘疾晦明收神冥漠適予心之軫愴覽而儷之控陳進飭臺恩追崇使範惟稟靈之匪泯尚禦侮之歆榮

贈虢州刺史史种世衡可賜成州團練使制

敕朕紀疆臣之勞愍戎翰之逝載加賁典用洽至恩具

官某深沈有謀勁幹能力屢奉典戎之寄頗著憂邊之勤館舍早捐鼓輦增愴已伸刺部之贈益峻團兵之名魂而有靈歆我茲渥

宋昱可贈供備庫使制

敕某臯以廷臣委之縣道會五溪之雜種掠數雉之孤城能率官軍出支賊黨不幸遇害遂隕厥躬有嘉死事之忠已舉錄孤之典曲加贈禮擢正使聯恩足慰于墳宵義亦矜于孝嗣營魂有識名秩是歆

故供備庫副使李隨可贈供備庫使制

敕某素推溫謹早侍禁嚴出護外兵甫還南服屬嬰无
妄之疾遽興不淑之嗟有懷恪恭載深傷靈特推卹典
用正使聯歆我漏泉之恩慰而游岱之魄

鄧惟素可贈供備庫使制

敕某恩以恤往者愛之殊仁不遺舊者厚之至以爾夙
將謹力逮事諸坊奉頤旨而必恭慎言樞而寡悔援乃
纂圖之慶比參侍幄之華尋遷隸于外庭俾亞承于諸

使勤庸有積命秩未優遽聞喪逝之音良軫盡傷之意
特正名于使範用紀績于銘旌尚識納言往歆渥澤

貴妃母夫人曹氏曾祖旭可贈祕書丞祖靖可贈
祠部員外郎制

敕崇戚畹之賢已昨封于成國褒祖服之美益寵賁于
慶閭具官某履素蹈和含章用晦早怡情于丘壑弗嬰
志于軒裳善既積于家庭慶乃滋于宮掖推本源流之
出恭延恩施之隆追建禮之禋曹疏秘丘之丞秩用示

壙宵之寵尚歆朝緯之榮

皇后姪女壻故西染院使劉永清可贈諸司使遙

郡刺史制

敕某夫葛藟之蔭既厚于本宗則葭莩之親宜延于異
數以爾材資通敏性尚簡溫介諸使而有聲幹乃局而
能力遠圖未究壯齒奄零覽長秋之上言乃中宮之外
屬宜優褒恤用厚常均持正直于內聯復兼榮于列郡
庸示漏泉之澤尚慰壙宵之魂

故貴儀曹氏可追封賢妃制

敕存著盛閼沒有令名念賢善之早淪寢逾年紀顧褒
榮之須稱益峻品儀以爾故貴儀曹氏參服憲言交修
懿矩選自元功之後嬪于禁掖之中逮事先朝早從後
掖收神惟寂緬太素之何歸留範彌芳藹祕庭而未已
申修茂典追寵列妃用昭恩禮之殊且旌才德之茂惟
淑靈之未泯尚名號之是歆

宜州刺史宗實故所生母任氏可追封縣君制

敕朕厚人倫之風篤戚藩之愛飾終有典教孝為宜具
官某故所生母任氏蹈履柔風誕育宗子曾享年之弗
永何先露之易零大宗以聞近支有請宜疏名邑之贈
以慰寒泉之思沒而尚靈歆我朝寵

德妃姪亡妻張氏可特追封郡君制

敕某妻張氏誕生慶闕蹈履柔風早歸舊德之門嘗疏
名邑之賦稔彰淑哲驟委韶華託屬列妃實有葭莩之
戚祈榮望郡用開湯沐之封式示愍章且旌婉範庶幾

近魄祇服追恩

觀文殿學士尚書右僕射賈昌朝曾祖緯贈太傅

可贈太師制

敕人乃本于祖郊以饗夫帝故朕齋明肅儉徧裸世室
淳濯祇慄親祠泰壇福既降而孔皆澤罔幽而弗暨矧
吾宰路之舊宜伸祖服之褒某首冠民宗才經王體文
采表于來世名聲動于前朝蓋源深者流長而德盛者
慶遠臧孫之善乃有後昆考父之恭是開達者惟燕詒

之醴德挺端右之令孫光輔本朝早追崇于前傳會成
熙事用進陟于維師寵乃曾門優我時德宜肅將于鬯
酒往祇告于文人

觀文殿學士尚書右僕射賈昌朝曾祖母魯國太
夫人栗氏可追封燕國太夫人制

敕王假有廟能享親以厚先禮行于郊大報天而尊本
極幽明之際充覆燾之間竝貺美祥畢覃惠澤矧惟舊
德懷乃先慈宜更大國之封以為曾廟之寵某氏出高

華之胄歸盛德之門居穆言容動循法度服共儉之訓
中饋是虔垂賢善之風後昆以大時予舊宰惟爾令孫
材居國棟之隆慶表里門之盛是宜象服遂荒大東會
成報本之儀益進追先之典采繁之詠早契召南析木
之津抑惟燕舊申昭異數尚賁淑靈

觀文殿學士尚書右僕射賈昌朝曾祖母崔氏可
追封秦國太夫人制

敕郊以報其本故高燎用升恩以究于下雖重泉無漏

所以承天地之竝貺昭人祇之普施矧吾舊德之宰有
懷曾妣之慈宜厚飾恩用追來孝某氏挺生名閎作配
宗公循召南之國風能承先祭佐夫人之家事罔間內
言貴範留芳後昆滋慶令孫嗣服曩時相予嘗稽舊典
之文已進小君之號屬成熙事益舉顯章介于山東齊
為成國之大胙夫關內秦蓋故都之雄尚歆加地之恩
彌篤高閎之祐

觀文殿學士尚書右僕射賈昌朝祖璉贈太師可

特贈中書令制

敕昭孝息民禮莫大于郊廟保姓受氏德必本于宗祧
熙事適成愷澤均被惟中臺端右之重資大門慶善之
餘用峻朝榮聿崇人本某深中直質強學敏文早彰秉
德之彝弗更為善之度行高前世惜人爵之未充慶在
後昆果棟臣之間出謨謀三事儀長百僚擢用纘祖之
文已寵維師之位屬成大報會泛茂恩申納內史之書
進崇右相之秩鳳池益貴鱣序增華尚歆告第之恩足

慰佳城之魄

觀文殿學士尚書右僕射賈昌朝祖母胡氏可追
封魏國太夫人制

敕朕飭齋輅祇見于清廟備法物肆類于后土德產之
致精意以享尊大道配嚴祖所以明事上之禮教天下
之孝既翕受元祉則敷施惠澤不獨專卿厥美亦使褒
優其先況我大臣敢格舊典某氏出高華之胄歸名勝
之門躬四德之賢少服從于姆教經二物之善早輔佐

于君子遺風尚穆來裔寔昌燕翼有孫元者在望臯正
名于巖弼已錫號于參墟澤既漏泉禮宜加地晉之始
賞魏則大名參稽于朝進胙而國益峻褒封之典尚祇
渥茂之恩

觀文殿學士尚書右僕射賈昌朝父注贈太師中
書令特贈兼尚書令制

敕朕裸于禰室明發有思郊于泰壇升侑如在惟天人
相與之盛有臣工協贊之美言念乃考豈不爾懷矧吾

揆路之賢早承家廟之祀宜褒先正用峻追章具官某
學洞本元行中儀表早振端朝之譽蔚懷表世之文藏
用弗伸早鬱王官之次乃終有耀挺生時棟之材冠別
殿之儀形席文昌之端右朕所體貌爾有慶靈爰當圖
任之辰已峻褒封之典錫之右相崇以維師屬郊報之
修成在國章之洽舉益進中臺之令申責壙宵之遊彌
表顯于家閭尚欽祇于朝寵

集賢相宋庠曾祖駢皇贈太傅可贈太師制

敕朕攷慎才傑緝熙政謀得詩雅巖巖之瞻屬以時柄
用春秋尊尊之誼褒厥曾門所以崇立輔之儀厚追遠
之典具官某曾祖某履和含正厚德秉彝服展季之小
官恬弗以怪韞次公之遠業鬱未及伸慶乃垂于後昆
時則生于上哲屏藩左右馮賴謨謀臯總幾庭已峻褒
先之典今升宰路益疏進等之恩賁寵維師增榮私廟
往修一卣之告尚歆八命之章

集賢相宋庠曾祖母王氏可追封齊國太夫人曾

祖母丁氏可追封魏國太夫人制

敕夫孝必務于本禮不忘其先朕選棟材之隆任以台宰圖曾世之懿峻厥儀品雖褒賢之禮優亦本祖之義著具官某曾祖母某氏賢明異稟法訓躬行修祭職于采繫承其先祖泣報囚于丹筆裕乃後昆時惟哲孫都我茂宰前陪樞幄之論追用密章之褒名爵既新湯沐宜鉅進昨東齊之壤升優全魏之名滋寵營魂尚識恩

禮

集賢相宋庠祖曜累贈太師可特贈中書令制

敕朕選有德相大政惟是名數之重進都巖廊則宜爵
命之加併崇祖廟示慶源之所本亦褒典之攸先具官
某祖某蹈道淳深詒謀清白浚都之賢好善世則有聞
太丘之德可師位曾未達遺恩在物留慶鍾孫挺生時
棟之材進膺袞路之拜用乂于我實惟爾先邁種之美
所滋裕後之祥乃茂昔樞柄之云總已貢維師今鼎席
之是居益兼右相褻榮偕峻慶靈弗誣歆此納書保爾

顯閭

集賢相宋庠祖母賈氏可特追封楚國太夫人制
敕亮天工者政之先尊人本者義之率惟國爵之重彌
大于孫謀則家廟之榮益延于祖配所以厚民風而昭
國體也以爾具官某祖母某氏賢有至行穆著柔風作
合名門盡虔共中饋之美交修善道得輔佐君子之宜
覆育垂慈燕詒著慶惟孫經哲若時奮庸進增湯賦之
名升薦密章之刻句吳已寵全楚用荒尚歆告第之榮

益右充間之美

集賢相宋庠父玘累贈中書令兼尚書令追封榮國公可進封鄭國公制

敕相王室者德之盛尊考廟者孝之隆惟慶源之深長則靈氣之回復時乃冢嗣柄吾大鈞屬當贊策之辰爰舉納書之典恩禮須究名數乃宜具官某父某位不配才性惟合道誠心恕物仁何止于放麇陰德在民慶乃昌于納駟挺生良器用人本朝擢總率于繁機已進寢

于先烈三師升冠二令兼榮今膺拜于文昌益進疏于
大國遂荒原武寔曰陪京彌昭爵命之崇滋厚烝彝之
薦尚歆禰室益右慶門

集賢相宋庠母王氏可追封越國太夫人母高氏
可追封漢國太夫人母王氏可追封秦國太夫人
母朱氏可追封燕國太夫人制

敕巖路延登有國繫其弼亮親廟崇飾故事著于追褒
誼惟繼嫡之均時乃寵靈之洽具官某母某氏柔明著

範淑哲含風以門閥之華來嬪盛德因圖史之訓居法
憲言存著善猷沒章遺懿右乃哲嗣踐于中階妥當枚
卜之初彌積先慈之感愍章前峻胙典益加攷按輿地
之圖進崇大國之號用昭慶善胥于恩榮庶幾原宥之
靈尚識治朝之渥

集賢相宋庠母鍾氏可追封晉國太夫人制

敕任天下之重國以賢為本稽內治之則母以子而貴
沉存著慈範而挺生傑才時則相子慶緣裕後宜舉追

襲之典用旌賢善之風具官某母某氏出高華之門蹈
柔嘉之則來儀名閥承訓大家間于兩社之占實生哲
輔徙乃三鄰之學遂躋大儒屬當肇位之升倬冠烝髦
之首粵從樞筦入正台階載崇陪幄之聯彌動累茵之
感褒章前峻淑德益宜進胙參墟之封增昭親廟之懿
厥靈不泯茲渥是歆

吏部侍郎同中書門下平章事文彥博曾祖崇遠
贈太保可贈太傅制

敕朕崇饗九房昭孝萬寓馨香格于上下德罔弗歆恩
施決于幽明仁斯為盛乃睠同寅之輔裁成右饗之儀
申飭愍章褒崇曾世具官某素風傳世美德在躬行固
重于本邦位不配于高行前言多識被河汾舊學之資
惠政所孚留蒲密字人之愛實啟貽孫之慶孚膺上相
之求自甫正于中階已迨甄于上衮熙成有典覃施及
先益尊帝傳之名用厚台臣之數慶餘所復歆告其承
吏部侍郎同中書門下平章事文彥博曾祖母宋

氏可追封魏國太夫人制

敕朕以孝饗熙成靈恩均被禮柄臣之重既孚號于大
庭尊曾妣之慈復納書于私廟具官某曾祖母某氏柔
儀異稟淑德少成本育粹于名宗早來儀于慶閭躬采
繁之法度先祭是承茂來葉之燕詒後昆以裕令孫挺
出上宰冠居羈膺枚卜之求已攷昨封之典逮茲均施
益用追先侔來輿地之圖優封大國之號采章兼飭名
數載加尚淑魄之有知歆愍章之既渥

吏部侍郎同中書門下平章事文彥博祖銳贈太
傅可贈太師制

敕朕宗祀五室合祛三神廣烝烝之風參侑于祖考推
尊尊之誼施及于臣鄰用加惠于大門示本恩于上相
具官某祖某循持雅行惠迪善猷自州壤以推風繇家
庭之儲祉孫謀詒厥資孤突善教之忠達者興焉賴考
父滋恭之德若時茂宰惟乃哲孫早序正于台聯嘗追
崇于保訓禮成宮廟慶洽天人益峻三師之名用厚九

原之飾惟慶靈之回復尚營魄之歆承

吏部侍郎同中書門下平章事文彥博祖母王氏
可追封越國太夫人制

敕朕追正郊宮之饗涓成陽館之祠秩上下以承神通
幽明而宣澤發于膚寸漏及重泉矧吾邦宰之賢有懷
祖廟之配曩慈所裕愍飾宜加具官某祖母某氏淑哲
成風賢明可範服箴圖而無斁循法度而弗違作合令
門穆嬪風而彌婉詒謀後世階慈訓以寢昌時惟令孫

持我魁柄自發揚庭之號已施飾壤之封賁象服之遺
榮申密章之時告屬茲成饗之慶永言來孝之追覆按
典圖進荒土宇增衍采章之等究宣恩數之榮燭于壙
宵歆我朝範

吏部侍郎同中書門下平章事文彥博祖母郭氏
可追封沂國太夫人制

敕祀者國之大事孝者人之至德明發齋栗崇嚴配于
合宮滲漉涵濡漏愍恩于幽安睠言巖宰之重有懷王

妣之慈稽若舊章敷于異姓具官某祖母某氏族惟甲
冠德本柔嘉啟遇觀之祥占歸于夫子積詒孫之善行
裕我弼臣比膺注意之求已飾追先之範逮茲宗祀覃
及慶靈益進胙于土田用申昭于家廟飾之象服正以
采繁惟營識之未淪尚采章之歆受

吏部侍郎同中書門下平章事文彥博父洎贈太
師可贈中書令制

敕德之醲者榮裕于來裔孝之大者光昭于前人朕卜

季商緒正宗祀哀對六天之大升侑三后之尊孰相邦
儀時我巖弼輔成世宗之享厥有茂勲申慰考服之恩
宜覃殊典具官某父某體仁居厚尚德秉彝惠和濟賢
者之風敏達擅吏師之望壯猷早謝惜高位之弗躋陰
德所覃宜後昆之滋大蔚興世嗣光輔朕躬命爰立于
巖廊敕追甄于禰室拜以三師之袞刻諸八命之章屬
祀祀之均休厚愍恩之追遠益進鳳池之貴秩用昭鱣
序之慶靈尚歆右相之榮當識上台之渥

吏部侍郎同中書門下平章事文彥博嫡母耿氏
可追封秦國太夫人制

敕朕將饗合宮先格太室既虔鬱鬯之裸還奉蒼璧之
祠妥侑尊嚴用度人倫之孝協共顯相則繫邦宰之忠
永言顧復之恩宜厚追襲之典具官某母某氏高華著
族柔正含章賢德式于六嫔嬪風經于二物輔佐君子
尊四教之善言誕育名臣被三遷之慈訓芳猷早閱懿
範彌昭慶在身支任居肱輔惟亮工之攸賴本諸祉之

所滋爰當正袞之辰尤動累茵之感追賁采繫之號進
加析壤之封時享輔修孝思增積稽若朝範刻用密章
昨茲土宇之美名賁乃筭珣之盛飾惟淑靈之匪昧尚
華渚之是承

參知政事高若訥曾祖諭贈太子太保可贈太保
制

敕國家優于用賢篤在教孝故二府登仕既馮賴于猷
為而三世追褒必究極于恩禮所尊人本之重宜厚國

政之咨具官某曾祖某節峻丘園風行州壤眷懷賢業
道不濟于當年貽燕善謀慶則蕃于來世纘乃祖服時
惟孝孫選自內樞參我中鉉擢以東宮之二品舉用追
章今以天子之三師升如愍冊且明有德之後式表襲
賢之先尚而靈承虔我賁寵

樞密使高若訥曾祖諭贈太傅可贈太師制

敕國家置使典樞本兵總務重茲時柄之委厚其曾世
之褒抑乃舊章斯謂殊典具官某曾祖某仁為已任德

東民彛撫仕爽于生前餘慶滋于身後令孫載誕近弼
是登寔資陪幄之謀用翊包戈之治載稽往策已賁上
公益先本祖之圖彌進維師之重密章以刻鬱壘是承
庶幾私廟之靈尚識治朝之渥

參知政事高若訥曾祖母王氏可追封祁國太夫人制

敕朕圖政軸之貳錄曾世之慈既進律而熙朝即納書
而告第所以推迹先懿歸厚時風具官某曾祖母某氏

柔範夙成善猷祇率族則衣冠之舊言惟圖史之箴正
宗事而聿修垂孫謀而云遠挺生良翰滋大慶閔粵從
某命之司預聞本政之議褒先有典益疏湯沐之封裕
後顯仁彌表燕詒之盛幽靈固在愍飾其承

樞密使高若訥曾祖母冀國太夫人王氏可追封
晉國太夫人制

敕國家法樞置弼陪幄議兵策既告于大庭恩即覃于
私廟進褒曾配抑著朝彝具官某曾祖母某氏特稟柔

風休有懿範詒孫謀而益遠流世德而逾醴祥發本支
任隆基宥先胙封于郡望已加號于小君爰當班命之
辰益舉納書之典按圖輿地拓土大邦升恩數以兼常
昭慶靈之滋厚往歆褒典尚識茂恩

參知政事高若訥祖審釗贈太子太傅可贈太傅
制

敕義率下而重禮治上而尊章德表賢既參聯于宰路
本仁厚俗必追寵于大門具官某祖某文武自將智略

寡二功名為任嘗慷慨以忘家力命難忱終咨嗟于抱
器雖貴塗則爽而慶閣以興字果驗于升卿器有踰于
安國俾若予采入預政聞時惟任能禮有異數益進上
公之秩用纘乃祖之戎冀而神靈祇我印綬

樞密使高若訥祖審釗贈太師可持贈中書令制
敕國家經武須賢纘戎在孝繇幾庭而進輔必祖廟以
伸裒所以旌哲表庸尊先重本著茲臺範厚厥朝風具
官某祖某力行體仁時中合道恕心是廣曾醜夷之弗

爭陰德所覃宜昆雲之有裕惟孫抱器若時登樞探觀
告第之章前用維師之袞益兼榮于浴鳳仍賁采于附
蟬以明達者之興且驗升卿之効惟光靈之所屬尚營
識之是歆

參知政事高若訥祖母追封扶風郡太夫人馬氏
可追封澶國太夫人制

敕厚民在孝濟政須才選賢以乂于王家褒功迺及于
私廟朝有著典我惟儀圖具官某祖母某氏柔靖自將

賢和無遂展如姆教之率穆然嬪則之修慈範早淪緒
風彌劭惟令孫之忠力預近府之政謀參樞柄之云初
稽納書之惟舊衍增湯賦之數追褒翟第之儀神而有
靈詔其無忽

樞密使高若訥祖母衛國太夫人馬氏可追封魏
國太夫人制

敕義乃率于祖仁必厚其先乃睠樞臣之良有懷王妣
之懿申加禮命洽被恩章具官某祖母某氏生德業之

門著柔嘉之範共儉以承于先祭休昌乃集于後昆時
維令孫弼我煩務納忠先哲方馮賴于高謨追遠飾終
益褒崇于愍冊溯服章之盛節拓土宇之優封昨以近
邦隆茲異數章慶源之濬發明慈覆之遠垂朱泯淑靈
尚歆榮渥

參知政事高若訥父懷謹贈太子太師可贈太師
制

敕朝家任賢倚重在于聞政臣子能仕推本繇于教忠

矧自幾廷入聯宰路宜疇陟命益峻褒恩具官某父某
仁厚存誠才明韞用世服義方之訓家承孝謹之風不
偶數奇鬱曾中之素蓄自他有耀集身後之遺榮是似
克家思皇生國方均參柄之重宜從飾禮之優追尊上
公申賁英袞尚虔師保之寵往歆印綬之崇

樞密使高若訥父懷謹贈太師中書令可贈兼尚
書令制

敕教之忠者子能仕德之盛者宗必興眷我名臣付畀

樞柄參攷前人之力用襄爾室之榮具官某父某稟自
誠明樂于名教含章抱璞惜大任之弗躋儲慶為基宜
高門之有開誕生哲嗣用乂本朝擢參宰路之聯已厚
壙宵之賁上公極寵右相兼榮今進翊于萬樞益申襄
于二令顯臧孫之有後庶李公之弗亡式將印紱之華
往修圭瓚之告先于而廟永右厥家

參知政事高若訥母追封河南郡太夫人閻氏可
追封鄜國太夫人制

敕夫名顯而滋重則禮從而益隆若乃繇上大夫而典
極升小司空而謀政爵祿彌厚于已茵鼎不逮其親故
宜按輿地之圖書內史之策進疏國壤申寵壙宵具官
某母某氏賢善自持柔明有助謹召南之共祭穆是嬪
儀喜京兆之平反仁于母道克家有子舉國曰賢已試
本兵之司復參制政之府往嘗追于封胙令增賁于號
榮顯爾誕哲之祥伸我任能之禮淑靈匪昧華寵當祇
樞密使高若訥母雍國太夫人閻氏可追封秦國

太夫人制

敕國家尊樞弼重兵柄登進髦哲已孚號于治庭推本
孝慈即班恩于親廟矧惟妣德宜厚密章具官某母某
氏仁淑有儀賢和居正從召南之百兩作合名門卜孟
氏之三隣勗成大器陟屺之哀遄邁累茵之感彌深自
巖坐之參升已陰堂之追飾錫土山于成國賁車服于
小君屬進總于繁機爰申加于愍冊紹開廣宇改胙大
邦具慰寒泉之思用示蓼莪之報庶幾營魄尚識寵榮

右諫議大夫充天章閣待制兼侍讀張揆弟京東
轉運使兵部員外郎集賢校理揆父蘊尚書司封
郎中可特贈光祿卿制

敕朕肅若舊典祠于明堂配侑盡誠永懷三后之烈褒
榮追禮覃及百工之親矧吾從臣兼相儀範瞻言考服
宜厚恤章具官某宅性惠和德基憑厚位不配于高行
慶乃裕于後昆挺生似續之良馳稱競爽之美數經便
閭膺選才林能仕本于教忠善繼彰于錫類愍恩所飾

故事當優增賁列卿之名昭示治朝之法幽冥匪昧
澤其承

文恭集卷二十一

欽定四庫全書

文恭集卷二十二

宋 胡宿 撰

內制

皇兄允弼特授依前檢校尚書右僕射充寧國軍
節度使同中書門下平章事北海郡王加食邑一
千戶實封三百戶仍賜推誠保順亮節守正翊戴
功臣制

門下稽若先生制茲大禘謂四時之常祭未極孝思約
一閏之小成誕為精享朕詳按舊禮攷卜孟冬駕言屬
車登享祖廟行朝踐之禮歌長發之章惟時親賢預我
祠祀盡肅雍之美同悽愴之懷亦既解嚴宜有褒賞用
數渥典式告大廷具官允弼地則茂親時惟明德繫二
南之化躬兩漢之風表儀王家有嚴重之質導訓宗子
得祇穆之和兼徽台司開賦王社宿邸彌謹奉朝滋恭
而自先甲肇禋申嚴始事率郇滕之諸國逮魯衛之密

親侍齋幄之深從昭鑒之近太室戾止廣樂繹如奉亞
裸之升極其恭志正赤舄之履亶無流心祖宗格思祝
嘏告止歆乃孝享賜朕祥釐腍肉是頒用先兄弟之愛
勞酒斯舉以澤公侯之勤優衍采田益疇真食仍加功
號之美竝昭名數之華國典攸宜家情允洽於戲同寅
恤祀既獲無疆之休夾輔慎徽益保有終之吉往欽厥
命永孚于休

除皇弟允初特授特進依前檢校尚書右僕射使

持節耀州諸軍事行耀州刺史兼御史大夫充感
德軍節度使耀州管內觀察處置等使加食邑七
百戶仍賜推誠保順翊戴功臣制

門下百世必祀德厚者流光三歲乃祫文繁則禮縟朕
訓四海之孝合七世之靈因時永懷備物親享稷容祭
若寶鎮在焉來九服之朝用六代之樂于時藩岳伯舅
二三弟兄助祭在茲侍祠有恪嘉饗云究慶賜遂行具
官允初體韻詳和性質淳固本賢王之後資聖源之先

遙制侯藩委高牙之重留宿京邸奉介圭之朝能慕善
猷綽有淑問自祖宗之講祀由奉常以肆儀結佩入齋
展軫從蹕清廟在望極駿奔之恭朱芾侍祠有肅雍之
美朕以皇祖右饗大嘏告茲熙事備成景福來格還衡
肆青進律疇庸乃眷戚藩益開土宇仍進表功之號更
升躡等之階恩禮之隆固先于異姓名數之懋滋表于
展親於戲承積累之祥膺節制之重齋祠參奉靈寵渚
加益慎爾猷往服朕命

除皇弟允良特授特進依前檢校司空同中書門
下平章事使持節鄭州諸軍事行鄭州刺史華原
郡王充奉寧軍節度使鄭州管內觀察處置河隄
等使加食邑一千戶仍賜功臣制

門下朕沿康復之慶薦昭報之誠合祀乾祇大陳牲玉
先期祓乎路寢申詔約乎郊丘禮文昭明儀體簡大既
執量幣獲侑祖宗之靈復因祭牐以親兄弟之國蓋合
揚于貺施用均布于福釐矧堯之變時雍始于敦族而

周之厚民德由厥睦親式是仁恩揚茲慶號具官允良
姿質淑茂體行端莊令問夙昭善猷允履戚藩云建使
節是持按圖啟封載擇膏腴之地班槐就列兼崇台宰
之儀入侍齋祠居奉朝請有陟恪之敏得雍肅之和朕
享告成爾庸惟穆既飲斯至乃澤厥勞鄭伯列于近郊
滕侯先于異姓班茲盛策進以崇階仍增井牧之封益
寵雲臺之號竝為異數用洽至恩於戲訖是上儀布茲
大喜羣工庶尹既國典之是孚至戚密親在家情之允

治益慎爾德以對厥休

除富弼行禮部尚書同中書門下平章事昭文館
大學士監修國史兼譯經潤文使加食邑實封功
臣散官勲封制

門下中樞治本裁教化之宜上相台光長官師之任用
緝熙于百度資變正于三階眷乃右垣時惟哲匠委政
事而已試攷名實以相符誕揚大庭付畀魁柄具官富
弼任重道遠性正德全閎敏推于上才博洽通于衆志

撓之不濁偉量表于彌沖簡而易從盛業彰乎可大首
膺魁壘之舉歷踐禁嚴之塗蹇諤發于爾躬啟沃盈于
朕聽羣由樞省出殿藩房名聲聳于遠夷風采繫于諸
夏遂膺枚卜實契具瞻朝有偉人物無異論持重守正
參濟以和告猷納忠一本于治屬以冢卿謝政首鉉佇
能諏俊乂之大臣疇若予采冠丞疑之上席僉曰汝賢
是用升自政塗處以師尹仍進秩宗之重復兼史觀之
名衍以優封昭茲異數用旌茂諒允穆師言於戲播化

鈞而理陰陽操國柄而撫辰象惟無心故能感物惟以
虛所以受人格于太和繫我真宰往踐乃位同孚于休
除王貽永授依前檢校太師行尚書右僕射兼侍
中充景靈宮使彰德軍節度使加食邑實封改賜
功臣制

門下升庸進等蓋裒德之彛章均逸待勞乃優賢之茂
典眷言俊老久總繁機乃圖宣翼之勤俾遂偃休之請
對加尊秩改治靈宮詠以剛辰告于列位具官王貽永

志懷明劭識宇冲深逮事及于先朝得尚榮于舊館用
絳侯賢子之譽入纘世功以征南武庫之才擢居師列
粵予紹宅之始嘉乃幹方之能召置機庭掌我兵柄周
旋一紀密勿萬微慕安世之典機本于周慎猶韓增之
領事濟以寬和又牧政而修明總武經而練達納忠匪
懈宣力罔遺遂兼台階仍冠樞席常益附蟬之飾尋還
浴鳳之聯抑乃榮章俞其謙請式是耆良之望深于眷
倚之懷比閱封章聯辭機劇敘晦明之嬰恙因夙夜之

肆勤閔茲高年累以煩事聽還溫省之務特寵殊庭之名益升右揆之崇復兼常伯之重進褒功之美號拓衍食之優封有嘉舊勲益昭異數於戲臣鄰之際貴保于初終進退之間思全于休美勉綏遐福尚佇敏謀

除張堯佐特授光祿大夫依前檢校太保宣徽南院使淮康軍節度使加食邑實封制

門下祇修郊報肅奉廟昭告虔前人裸鬱香之酒大旅上帝颺燄燎之煙餼食洽于羣神助祭來于四海神人

感悅福嘏昭通樂與臣鄰均茲休祜瞻惟近職時乃內
徽亟酬從蹕之勞參錄陪祠之劭用頒慶賜式示寵優
具官張堯佐履尚淑均器懷詳敏早會右文之治夙馳
居業之稱發策俊廷膺斂才之高選振纓公路達從政
之大方寢服近嚴稔更內外委典京之尹任峻司會之
使名總治要煩滋見計籌之善參圖勤濟進聯徽鉞之
崇有若孟津亶為巨屏陪我京室控于河橋用繫帥節
之行出委戎翰之近憑熊成治卓馬來庭通文石之內

朝進班迺列陪甘泉之法從預相緝儀志力允嘉事為
咸濟逮端門之還軫稽大寢之策勲崇以階聯拓茲井
賦允為異數用示澤勞於戲郊為國之上儀有繫敷贊
賞乃朝之茂典敢廢舊常往服褒嘉勉思欽慎

除曹佺特授依前檢校尚書左僕射充保靜軍節
度使加食邑制

門下朕臯嬰機務稍煩神明遂滌慮于大庭乃味道于
虛室吉祥來復剛健無虧開懌羣臣慰安億姓蓋二儀

之相沖子乃三后之翼曾孫惠我壽康繄茲保佑乃嚴
祕寢合祀大神以對越于天休用敷錫于朝慶藩岳以
職而來貢臣工執事而有嚴自齋濯以潔誠逮瘞燔而
訖事禮容疊穆氣象晏溫驗休證之著然宜祥釐之錫
爾眷言侯度用舉寵章具官曹佺識局夷邁志懷敏劭
夙稟德門之慶蔚為戚畹之華入義府以敦詩時惟良
帥登太常而紀績世著大功無亞夫貴倨之風有陰興
謙退之行居則以列侯而就第善不近名出則以良翰

而守藩達于從政近易東秦之節俾臨舊許之邦撫是
寰封陪茲京室命書甫降祀典告成蓋圖守屏之勤參
錄充庭之上衍封爾宇加惠于朝進以茂勲疇其真賞
孚乃王庭之號用為侯服之光於戲賞以勸其功祀以
報其貺惟前人之烈已頒誓于河山惟後昆之賢復繼
戎于茅瑞往服慶賜勉思忠規

除張茂實特授依前檢校工部尚書充寧遠軍節
度使勲封食邑制

門下朕歸以日中聽政夜分觀書雖禹湯求理之心未嘗敢怠而黃老養性之術頗有所虧賴穹厚之惠康蒙宗社之數佑善氣來復吉履以強恭即路朝述修祀事以虔大報用答元祺藩岳底貢而畢臻神祇呈貺而胥穆薦享之夕儀物粲然丹燎告升休景彌燭策勲有典頒昨著文眷言戎翰之臣用孚庭號之慶具官張茂實誠節果壯志度深沈濟美本于勲良好謀通于奇正習安邊之將略善于拊循佐絕域之使才得其要領以忠

謹之操入衛于巖廬以武毅之風出分于制轂牙旗云
建師律有嚴十國為連析普寧之輿壤萬夫觀政殿上
黨之強藩封守以安方貢惟謹適成熙事均賦祥釐參
澤內外之勞昭示幅員之慶時惟良帥崇以勲名仍開
衍食之封益示陪敦之寵茲為異數式顯茂功於戲邦
國用光天人助順康哉之慶豈獨在予霈然之恩庶均
維屏往服茲寵益慎爾猷

除李昭亮依前檢校太傅同中書門下平章事充

景靈宮使昭德軍節度使制

門下總戎參鼎兼名器以為榮易地建牙處形勝而斯
重矧惟師弼之舊久莅幹垣之煩閔是服勞嘉茲請觀
俾升藩于制閫命司職于殊庭參懋勤康抑惟彝典用
頒明制固允師言具官李昭亮器略深明誠懷沖厚稟
山西之勝氣通圯上之祕韜粵自大門載忠規于奕世
眷言爾考著勲力于先朝稱辛蘇之將家為摯任之后
族克生哲嗣聿濟美猷亦嘗幹不庭之方有禦侮之力

入居宿衛提利兵而誰何出護將屯領中軍之節制擲
釐符箴之任就升袞鉞之崇逮滿北門之更復委中山
之鎮苛慝不作拊循有方久去闕庭頻移星歲宜入奉
于朝請特申需于寵靈換上黨之節旄分壺關之茅土
益增真食彌衍采田俾司典密之都仍踵太清之職體
貌惟舊恩禮攸宜於戲真祖在天實右慶靈之祚瓌宮
置使必先台宰之臣嚴奉在茲往欽無忽

除曾公亮檢校太尉充樞密使制

門下經遠慮微必慎制兵之術折衝消難亦資畫策之
臣是憲樞躔聿崇使號蓋政謨之攸寄匪耆哲而莫居
適得其人誕敷厥命具官曾公亮風業碩茂志慮深純
學多貫于前言性頗修于中道有方重之德可以杞躁
而鎮浮有明達之才可以造機而成務嘗講勸于左右
亦召置于禁嚴敷我訓言代予明命間請臨于橐輔遙
擢置于京師咸有治功遂聞政本通明練于百物參和
穆于羣言貳公之司久陪于論道內密之任宜正于筦

樞仍加傳道之名更益陪敦之數崇階馭貴真食衍封
竝示寵章式旌殊禮於戲典機之任莫慎乎微擊析之
言蓋取諸豫勿謂承平之久益思備禦之深祇服斯言
往踐乃位

除田況特授檢校太傅充樞密使進封開國公加
食邑實封制

門下本兵近司參置于使號經武大柄允屬于材賢日
圖宣哲之良用舉正名之典定自朕志揚于王庭具官


田況誠志純深茂才冲劭寬粟發乎謨德博洽本乎多
文策從三道之科置諸四禁之地得王臣匪躬之節有
國士無雙之風參賴敏猷數當大任保塞蕩平之略鎮
蜀撫循之勞明智不疑淵謀善斷間亦委之大計試以
周才迎盤錯以皆虛彌彰利器汰精剛而不耗自表良
金擢典內樞之繁稔聞前箸之畫一乃心而匪懈研諸
慮以惟微見于忠精亶有成績參圖俊德升正機庭仍
傳上公益疇多賦崇階是陟異數在茲於戲樽俎之謀

遙制于戎落樞機之地上法于斗宮勉慎乃思以輔予治

賜梁適特授依前行尚書禮部侍郎知鄭州仍改賜功臣制

門下褫機政之煩均屏翰之逸左右修輔蓋陟恪之久勞內外肆勤在眷毗之一體爰正庭號用告朝倫具官梁適局致夷通性業開爽入我英彀之選參于橐從之華召自複門侍于通閣預贊書于明命備進讀于丘墳

嘉謨納于論思敏用彰于強濟臯圖制閫之效擢貳本
兵之司職典樞機地親帷幄亟參聞于政道遄敷燮于
辰階出入五年周旋二府苛慝比作變異重仍嘖有煩
言達于予聽曾淑聲之莫建在清議之弗平屢上封章
求還印綬朕思全進退之禮務崇始卒之恩參錄舊勤
尚仍前秩以春官亞旅之重莅黃圖右壤之雄臨長鄭
人頒錄漢詔於戲台宰之職任國之綱維寡輔之邦陪
京之襟帶往服茲命尚體至恩



文恭集卷二十二